

Ambulánsia Japaun ni'an rua Entrega ba Misaun Lepra Timor-Leste.

8 Novembru, 2024.

Iha loron 8 fulan-Novembru, tinan 2024- Governu Japaun entrega ona ambulánsia Japaun ni'an rua ba Misaun Lepra Timor-Leste (MLTL). Serimónia entrega ne'e hala'o iha edifísiu Misaun Lepra Timor-Leste iha Tibar, Munisípiu Liquiça. Sr. Tetsuya KIMURA, Embaixadór Japaun ni'an ba Timor-Leste hamutuk ho Sra. Dulce da Cunha, Assesóra Prinsipál ba Ministra Solidariedade, Sosiál no Inkluziun, Sr. Kazuhiro Morita hosi Sociedade ba Promosaun Diplomásia Japoneza (SPJD, siglá Inglés), Sr. Shinnosuke Kawabe, Sr. Shintaro Osumi hosi Bombeiros Sidade Tokai, staff ONG, no parte interessada sira seluk.

Ambulánsia rua ne'e uza ona iha sidade lokál sira iha Japaun no doasaun ba Timor-Leste liuhosi Governu Japaun nia Asisténsia Finansiamentu ba Projetu Seguransa Umana iha Baze (GGP), iha kooperasaun ho Sociedade ba Promorasaun Diplomásia Japoneza. Ambulánsia sira ne'e sei utiliza iha atividade sira MLTL ni'an, no espera atu hasa'e asesu ba atendimentu médiku ba ema sira iha munisípiu Liquiça.

Antes hala'o serimónia entrega, tékniku no médiku emerjénsia na'in rua hosi Sociedade ba Promosaun Diplomasia Japoneza fó formasaun durante loron haat ba staff MLTL.

Durante serimónia, Embaixadór Kimura afirma, "Governu Japaun promove ona iniciativa sira atu halakon diskriminasaun hasoru sira ne'ebé afetadu ho lepra no sira nia membro família sira iha sociedade internasionál, no envolve ativamente iha atividade esklaresimentu, apoiu médiku, no edukasaun direitus umanus. Governu Japaun komprometidu atu apoia Timor-Leste iha ninia esforsu sira atu hadi'a asesu ba kuidadu médiku iha aspetu ida ne'e". Nia hatutan, "Importante mós atu sira hetan manutensaun no jestaun ne'ebé di'ak iha futuro. Funsionáriu MLTL sira hetan hela formasaun hosi Sociedade ba Promosaun Diplomásia Japoneza. Há'u hein katak staff MLTL sira sei uza ambulánsia sira ho responsabilidade, foti abilidade ne'ebé hetan hosi formasaun. Tanbá ne'e há'u dezeja ba ambulánsia rua ne'e sei hanoin ba tempu naruk nu'udár símbolu amizade entre Timor-Leste no Japaun".

Governu Japaun implementa ona projetu GGP hamutuk 141 iha munisípiu hotu-hotu iha Timor-Leste dezde tinan 2000. Ida ne'e, hanesan dala rua ne'ebé Japaun fornese ambulánsia ba Timor-Leste.